

進賢縣志卷十八

人物

良臣

儒林

忠節

良臣

饒景暉字仲奎萬厯戊子與兄景暘弟景暉同舉於鄉時稱三饒次年景暉成進士授工部都水主事鳩工大內諸璫斂手權武林端潔不苟獲漏稅者笑而遣之由是商旅願出榷額增三千金任順慶知府擢福建提學副使考滿有聲復以叅政兼提學蓋異數也時弟景曜督學兩浙同日命下朝野榮之擢四川巡撫時東餉初增徵調四出蜀又困採木景暉疏蜀政十二要曲爲拊循清屯田荒蕪侵沒者數萬頃歲省折色二萬四千有

進賢縣志

卷十八

人物

一

奇會城圯捐資修築其後叛酋攻成都百日不下川人賴之初景暉在事時藺酋殊無叛意遼裨將欲自行郡邑徵兵景暉止之亟檄所部集武健益調藺酋兵二萬給行糧犒遣土漢兵皆權躍赴遼秋毫莫犯尋推兵部侍郎理南京戎政會有忌者拂袖歸卒贈尚書予祭葬

以下俱本省志府志舊縣志

饒景曜字廷獻生而孝友有器量尤沈毅寡言笑萬厯壬辰成進士歸里謁當事極言里役蠹胥諸弊情法不平又言敲朴太重自是侵漁者按如律追比稍寬里人有欲陰暴其兄短者懷百金爲壽峻却之且爲開諭里人感悟相好如初授刑部主事會礦稅中使四出中外抗疏爭之諸璫忿甚動以違旨刻奏逮

治者甚衆大臣論救莫能解以景曜清貞皆屬之讞決景曜按治無所枉撓權奄蜚語撼之因慨然曰先朝貂璫擅柄朝野冤痛今可使無罪者更入死地乎解釋數百人晉河南叅政浙東台紹道會浙督學遷去景曜改督兩浙學政時會稽鶴陽錢公視學江右景曜長子元琦與試錢不以同官子故錄科景曜以錢公子文體怪僻置下等人咸服其公備兵金衢設法勦礦盜浙東以安撫按上其功旋陞浙江按察使管理南直隸徽寧兵備時宣城某勢甚張九卿子弟爲所媒孽致大獄承問諸有司率顧望莫敢直景曜厲聲曰吾輩官可棄安可爲殺人媚人之事卒辯其誣正告訐者罪陞四川右布政未任而卒官橐蕭然

進賢縣志

卷十八

人物

一一

豫章論清操以爲最

饒景暉字叔淨萬厯乙未進士授保定府推官聽斷明允庭無冤獄時獲盜三人內一老一少詢知爲父子也上官發牒例皆斬景暉不忍其父子就戮乃出其子教戒再三釋之轉揚州推官時副留守坐次違制暉持舊例抗忤直指拂衣歸事下吏部覆疏謂景暉清風亮節賢聲四起以禮議罰事屬苛求姑從平調以勵官箴行取禮部主事進郎中議四方款貢宗藩冒濫及開科正文體諸事俱見施行累遷廣東右布政使巡按御史陳某閩人也閩米商千百艘蜂集粵海米價翔貴擁太守控按臺按臺袒閩商民大鼓噪勢洶洶按臣踰垣走景暉聞報急馳往

諭止之處置得宜民乃定後按臣自慚反論景暉坐視奪景暉俸乃解綬歸

饒位字廷立萬厯己卯領鄉薦第一庚辰進士授內黃知縣奏最擢河南道御史先是張居正奪情論之者悉廷杖落職諸賢久錮位獨昌言起廢直聲大振巡按貴州養病未任復起巡按廣西改南京督學御史拔識人才謝絕請託坐是忤時遂致告歸二十餘年光宗嗣位起陞尚寶司卿累官至大理寺卿讞牘平恕屢雪冤獄陞工部右侍郎時大工浩繁目擊時艱以母老告歸侍養位通籍五十年居不增椽田無益畝識者皆服其清執

進賢縣志

卷十八

人物

三

饒伸字抑之萬厯進士授工部主事黃洪憲典順天試大學士王錫爵子衡爲舉首申時行壻李鴻亦與選禮部主事于孔兼疑舉人屠大壯及鴻有私郎中高桂遂謫可疑者八人并及衡衡實有才名錫爵大憤疏辨與時行並乞罷帝留之命禮部覆試侍郎于慎行以大壯文獨劣擬乙置都御史吳時來不肯桂力爭乃如慎行議列甲乙以上時行錫爵調旨盡免黜且奪桂俸二月伸乃抗疏劾時來附權蔑紀請與錫爵洪憲俱賜罷錫爵時行杜門求去帝皆慰留而下伸詔獄給事胡汝寧御史林祖述等交章詆伸以媚執政由是伸廷杖削籍伸旣黜朝論多咎錫爵乃起伸南工部主事改南吏部引疾歸天啟初起南光

祿少卿累官刑部左侍郎魏璫亂政請告歸兄位累官工部右侍郎母年百歲與伸先後以侍養歸一時以爲榮所著有易經會解學海六百卷

饒景暘字廷陞萬厯戊子舉人戊戌會試乙榜授澧州知州問民疾苦嚴於馭吏內艱服滿補授薊州知州修城堡有功陞刑部郎中奉差恤刑貴州全活疑獄三百人陞汀州府知府以鋤強扶弱懲貪摘奸爲本歲饑蠲金賑饑歷任六載以清廉稱百姓建生祠置祀田遷廣西按察司副使分守倉梧道未任而卒陳應元字孕初少試邑郡輒冠其曹爲諸生不羈所得館餼俸厥弟仲觀經紀以供賓客年四十三始舉於鄉明年庚戌成進

進賢縣志

卷十八

人物

四

士授刑部郎有方士孫全挾房中術長安貴人多與之遊每購人子女年十三四膚理克悅者啗以脂腴久之以合藥物取重貲事覺諸貴爲請者書盈案元斥不視白主者立令伏法不少貸平反粵獄所活二百餘人時兩粵開府周嘉謨清嚴不妄交與聞應元治行輒嘆服嘗從容曰吾故爲令有枉囚欲爲脫未果迄三十年其人稿項垂盡矣向讀其爰書愴然悲之吾幸不死復及見公之活此人也陞延平知府下車詢民所苦益厲清操庭不設大杖視事五年未嘗入人贓罪郡豪張監與賈人吳爭治利監恃泉州貴公子翼之應元訊於城隍祠中竟以治歸吳城外水漂民居比閭失火悉捐俸錢賑之鄭直指宗周清流

士也察治行以元爲第一尋擢河南兵備副使永城山賊亂卽星馳扼賊巢賊散走火其寨俘逆首數十人而還士民安堵左遷泰安知州四方禮岱宗者冬春常數十萬人每日盱諸店戶籍所至人數納州衙明旦鈐以印還之例一人輸香稅銀八分於官以七分佐國用以一分爲公費後增至一錢二分應元至經稅外盡除之所除歲二萬餘兩頃之轉刑部告歸家居二十餘年癸酉冬以舊任逋賦復至泰安父老迎勞百餘里咸感嘆泣下事白戀戀不忍去友于之性晚而益篤日召諸父昆弟具醇酒達夕陶然言不及家事年七十有五祀鄉賢

陳良言字勉績萬厯乙未會試乙榜任新安知縣舉卓異調合

進賢縣志

卷十八

人物

五

浦知縣有廉能聲四登薦剡陞蜀山知州會勦安酋以監紀軍功陞紹興府同知清介勤慎合浦紹興並尸祝焉調揚州江防同知繕城池建江樓修二閘濬屯塢革稅司侵漁揮掣鹽陋規甲戌乙亥流寇孔亟耽視淮揚捐俸積穀募兵寇不入境在任六年厯薦二十有九以引年歸里內行修飭足跡不入公門捐貲助修縣城又歲歉大出金粟賑饑雖屢空不問也督學侯峒曾祀之鄉賢

陳良訓字式甫萬厯癸丑進士授大行人遷戶科給事中時魏璫竊柄勢傾中外良訓入垣五日卽具國運方興多難未息之疏剴切千言畧無避忌璫銜之未幾僉都御史楊漣數璫二十

四大罪璫肆辨匿漣奏先下其章廷臣愕視莫敢發良訓獨奮
言權璫辨疏不宜先下璫益恚甚矯旨鑄級回籍崇正初起原
官旋轉吏科時冢臣王永光者固慕良訓良訓又言會推弗協
臣職司封駁寧忤冢臣不敢負任使永光滋不便乃左遷良訓
臺紹兵備叅政上持疏示閣臣閣臣咸言吏掌科外轉非例請
召部臣問故良訓具疏乞恩放行至官綢繆海防倭不爲患擢
浙江按察使浙大藩塵案山積良訓遇事立斷人稱神明遷陝
西右布政理錢法飭軍儲日隨征討在事五年殫盡心力舉廉
卓第一連推三鎮巡撫皆爲柄臣所沮後擢鄖陽巡撫鄖介秦
蜀楚豫之衝賊衆盤踞良訓單騎受事昕夕坐城上矢石交加

進賢縣志

卷十八

人物

六

厲戰士意氣如平時以計殲劇寇郭三海重馬二坪上龕五
虎等賊捷聞賜蟒幣銀紵有差已復爲蜚語所中歸旋卒

朱身修字安百萬歷丁未進士授溧水知縣以清廉第上考擢
南吏部侍郎特立不倚循資出爲福建副使累官至左布政在
閩二十餘年恩惠翔洽常視海道篆海寇攻泉州城幾陷身修
激厲將士禦之城賴以全尋卒

樊尚燦字明卿萬曆丙辰進士授應城知縣調繁江夏擢御史
奉命巡鹺增解課百萬羨銀七萬悉以助邊代燦者某崔魏親
也爲所誣落職璫敗詔起原官巡視京營值都城震驚晝夜防
守陞太僕少卿以城守勞加三品服俸擢河南巡撫流寇猖獗

渡河尚燦勒兵擊走之或劾尚燦避賊磁州遂褫職崇正間復官未幾卒

金廷璧字德潤家貧力學不倦舌耕供脩灑萬曆癸丑成進士任江陰知縣江陰巖邑執政以悃愾吏非所宜改授武學稍遷學正轉南刑部郎不擊斷而曹事治陞邵武知府丁憂起補湖州府加學額調南雄知府直峒爲寇廷璧擊敗之於魚臺請以橋稅羨銀三千增高郡城陞荆西道副使寇從間道陷當陽廷璧兼顧郡邑出私財饗士士奮擊寇屢北尋以疏論免歸里居棲賢山詩酒自怡不改其素

熊震字長男萬曆癸卯舉人家貧力學屢上公車不第凡一爲進賢縣志

卷十八 人物

七

學諭再爲縣令清苦廉介愛民好士及歸田日家無十金之產先世敝屋數椽不蔽風雨澹然自適閉門讀書而已男耳字小李丁酉鄉試乙榜亦亮直不苟

余敬中號海鷗萬曆壬子舉人任蕭山知縣方正廉靜擢刑部郎出知瓊州府所至不改清操時有劇盜久未成獄巡按檄敬中審決盜以數千金求生却之竟伏法

章文標字憲卿三十八都人以萬曆乙未會試乙榜知龍泉縣惠政宜民陞晉寧知州乞休歸田三十餘年四舉鄉飲大賓耿介自守於勢利泊如也

劉洪謨字惟後南昌之梓溪人以進賢籍補邑諸生萬曆二十

三年進士授建德知縣調仁和皆有惠政三十年陞南工部主事蕪湖抽分處脂不濡有中使齊佛像者驛騷洪謨嚴治其黨復有遣購御膳者洪謨以非簿正格之三十二年陞南禮部郎中三十五年遷承天知府抗陵監不肯下調真定知府三十八年陞易州兵備賑饑飭關有聲四十一年舉卓異陞漳南叅政四十二年閩稅監高宥告休卽行議以擅離貶所四十六年補貴州都清道副使天啟元年以疏捕叛苗最陞廣西桂平道叅政旋陞光祿少卿疏薦漳州處士丁懋已乞徵入進講三年陞太僕少卿譔葵輸六篇奏之旨嘉其忠復薦庶吉士王啟元進講已因魏璫焰灼遂三疏告休時不謀而同解組者山陰劉公

進賢縣志

卷十八

人物

八

宗周也歸家講學隨時問答多所啟發年七十七譔大學續衍義十八卷於崇正二年奏之謨恬澹簡重與顧文憲趙高邑談學而不立幟其族少宰文簡中丞石閻元輔文端皆與公同志同仕而公雅不相援引

胡奇偉字彥蓼崇正丁丑進士授富順知縣有廉聲庚辰考察忤時貴補常州府檢校陞清州府推官能執持不苟嚴懲藩役之害民者民甚德之值寇亂守禦謹嚴有全城功壬午本省同考稱得人陞應天府推官職方主事至副使生平持節義慷慨自矢能不負其所學丙戌之交被執不屈死

吳士元字來復仲第三子也早孤萬曆乙卯舉於鄉母胡安人

病卧公躬侍藥餌不欲行胡安人曰苟出而大汝門予願也會
陳公蠡源入京命後車載之士元行至潯陽固謝陳公歸匝月
胡安人謝世士元哀毀骨立逮己未成進士授檢討己命注起
居講經筵撰制誥修國史士元外和光而廉隅內立頗不爲世
所容丙寅封晉藩因便道引疾歸里庚午起贊善辛未轉諭德
遷國子祭酒掌南翰林詔修十三經事竣疏報附獻規頌有旨
嘉納復詔修二十一史又廣上意捐俸鑄小學頒行郡國甲戌
陞詹事掌翰林院事在掌院凡明經廷試故事最髦者輒遙授
四人士元謂縻以空名實錮之也政府以違例爲言士元力持
竟減於往額者二其隨職盡規愛惜人才多此類也丁丑以掌
連疏乞歸卒年七十三贈禮部尚書

進賢縣志

卷十八

人物

九

詹禮部右侍郎兼侍讀學士召皇太子加冠講官賜金帛有差
羅憲陞字拱北希賢子中萬曆乙卯鄉試初授吉安州學正程
文較士無虛日拔其尤而貧者教養於署中陞廣東新興知縣
屢鋤強梗發奸摘伏如神而和惠宜民民終愛之撫按交薦其
才解組歸教家嚴肅才行端方操守清潔鄉鄰稱其有父風焉
涂紹燿字伯聚大理卿杰子由新建籍中萬曆乙卯鄉試己未
成進士授南京工部主政陞四川提學歷廣西左布政使紹燿
深於理學末年講學澹臺祠一時名俊俱宗之

按江西通志載涂紹燿有二人一字伯聚南昌人進士邃於

理學督學四川公明並至著四書兒訓士子賴之蜀中督學
推第一人一新建人杰之子萬厯己未進士官廣西左布政
使舊志合二人事爲一恐誤

樊良樞字尚默萬厯甲辰進士初授浙江麗水縣知縣調繁仁
和在任飲冰茹檠修文廟及通濟堰葺講堂置學田以給士之
貧者民爲立祠西湖陞刑部主事累官至雲南提學副使丁憂
服闋起補浙江時魏璫煽焰所在立祠浙祠成屬學使撰文遂
拂衣歸里時論躓之再起分守湖廣觀察粵西刑獄多所平反
陞陝西右布政使遂乞休著有四書五經卮言約語易塵讀易
日錄八代金石古文等書藏於家子重鵬字仲搏樸淡自守不
進賢縣志

卷十八

人物

十

交華競有父風

熊夢登字子先博學雄才同輩屈服顏竣朱健俱及門天啟卒
酉舉於鄉復姓張名登任陞梧州府推官蘇州府同知俱有政
聲引年歸里爲人方正簡靜待人以誠推獎士類瞻恤親黨務
歸於厚

萬谷春字汝水三十七都人萬厯己未進士任吳縣知縣下車
清慎自矢吳中賦重奸詭百出谷春覈良頑峻期限始終不藉
他手課不負而民安之萬厯末年加派孔棘谷春悉搜括義租
幣餘抵解不擾於民歲省民間編銀一千八百餘兩又革典櫃
鋪役諸弊士民德之陞兵部主事轉金衢道尋調西川關西皆

有功績罷歸

熊明遇字良孺萬曆二十九年進士授長興知縣長興最苦民解明遇建兌倉其法民輸之倉而官兌之漕艘總漕及巡撫下其法於吳浙咸稱便焉太湖劇盜橫行明遇計擒之因出他邑盆獄若干人又置雜役田以免頭會建松水居與諸士課文講道尋擢兵科給事中疏言今春以來天鼓再震於晉地流星晝隕於清豐地震二十八天火九石首雨菽河內女妖遼東兵端吐火卽春秋二百四十年間未有稠於今日者且山東大稔人相食黃河水稽天兼以太白經天輔星湛沒熒惑襲月金星愆行或日光無芒或日月同暈或爲恒風或爲枯旱天譴愈深而

進賢縣志

卷十八

人物

十一

陛下所爲皆誣天拂經之事此誠禽息碎首賈生痛哭之時也敢以八憂五漸三無之說進內庫太實外庫太虛一可憂餉臣無餉邊臣開邊二可憂套部圖王插部覬賞三可憂黃河泛溢運河膠淤四可憂齊苦荒天楚苦索地五可憂羅足不備棟幹微撓六可憂羣譁盈朝訛言滿路七可憂吳民喜亂冠履倒置八可憂八憂未已五漸互根太阿之柄漸入中涓魁壘之人漸如隕墜制科之法漸屬奸藪武庫之兵漸至銷燬商賈之途漸至梗塞五漸未已三無蔓延奸民可熒惑天子小校可邀惠絲綸是朝廷無紀綱滇黔之守令皆窮途揚粵之監司半規避是邊遠無吏治讒搆之口甚於戈戟傾危之禍慘於蘇張是士大

夫無人心又襍引天文書以證時事凡數千言皆極危切忝詩教輩以明遇與東林通出爲福建僉事遷寧夏叅議天啟中進太僕少卿尋提督操江魏忠賢黨謀盡逐東林以明遇常救御史游士任給事中薛國觀遂劾其黨庇狗私忠賢矯旨革職坐汪文言獄追贓千二百金謫戍貴州平溪衛崇正初釋還起兵部右侍郎南京刑部尚書改兵部疏陳四司宿弊悉見採納山東叛將李九成等陷登州明遇信巡撫余大成言力主撫議久不就撫乃調關外軍討定之是時我

大清兵入宣府巡撫沈榮與中官王坤等遣使議和餽金帛酒牢諸物大軍卽旋事聞帝惡榮擅專召對明遇等於平臺明遇

進賢縣志

卷十八

人物

十一

力爲榮解帝不悅逮榮下吏於是給事中力詆明遇榮交關誤國明遇再疏乞罷命解任候勘尋以故官致仕用薦起南京兵部尚書改工部引疾歸國變後卒著有五經約則筆格致草及綠雪集青玉集華日集攝華集中樞集南樞集英石集延喜集李日池字浴咸進賢籍臨川人崇正丁丑進士授鎮江司李公平廉恕稱明允之職攝金壇縣事革火耗清溢額之賦至三千五百餘金悉還之不旬月而積逋以完壬午南闈分考得士九人皆一時之傑行取擬臺席時柄相欲招致門下日池抗節不赴遂改授禮部主事請告歸里值土寇克斥日池慷慨言於當事殲厥渠魁保障之力鄉里賴之處家素孝友中懷坦白與人

和易雖處貧約而風致浩落未嘗稍損焉

熊人霖字伯甘明遇子聰敏絕異九歲解唐詩大意十一卽尋究性理皇極經世諸書十五赴童子試爲學政黃汝亨所首拔自是試輒冠軍崇正丁丑成進士任義烏知縣平生留心吏治戎政古今沿革典制尤兢兢宮保手訓揭諸堂楹出入顧之矧建城牒復表章駱臨海宗中簡王宗文諸集立祠祀焉葺學課士日爲講說經義平糶賑粥代完丁糧免派燈夫善政甚具兩臺高其能屬視浦江篆浦故多逋開誠勸諭士民鼓舞五日輸其半月月足額當時比之倪寬中貴人督造杭州勢張甚人霖獨與抗禮投一空刺奄黨爲之心折詔以修練儲備四事課長

進賢縣志

卷十八

人物

十三

吏人霖治行第一擢工部郎會菁賊起溫處間江閩震動撫院奉旨會勦以人霖威信素著奏令以部司監軍調度軍事人霖多設間牒開示生路賊惶怖乞降功成甫四十日補吏部歷任大常少卿丁內外艱哀毀過禮尋感疾卒人霖天資醇厚賓禮賢士汲引殷殷博學深思造次紙筆不去手著有四書繹詩約箋名臣錄繹相臣繹忠孝經繹進賢邑乘藏於家

江秋時字念元治之孫性坦易與人言皆由本衷無纖芥矯飾亦不知世人之有欺詐者篤學能文萬曆乙酉鄉試幾得解而失之抑置乙榜後以蔭補官爲留都總臺照磨操院丁公特重其爲人陞福建邵武別駕至誠御物士民咸以古人目之

陳維謙字仲容少以才行見知於臨川湯海若先生自是聲稱藉甚好奇賞異落落自喜萬厯丙午領鄉薦任刑部主事以議鄭鄴獄不肯予重比忤烏程謫南陵司理又請罷巡方各縣漿洗例銀忤直指遂去官歸崇正丙戌丁亥歲大饑朝夕不給求食於諸兄弟日具粥二碗卒之日無以殮聞者傷之兄維中字伯常亦知名

陳維恭字仲來萬厯舉人與同邑李仲章同榜齊名時有二仲之目博聞強記性澹潔有氣節初任海州知州減浮賦修築堤壩一方賴之旋以兵興皖撫鄭二陽題監其軍調度悉中機宜改陝西屯田同知不就兄維泰字孟來亦知名

進賢縣志

卷十八

人物

十四

江泰字大來天啟丁卯舉人任碭山知縣崇正之季盜賊充斥民不聊生漕糧無從措納縣令以逋賦得罪泰以安東田產及屋變價代民完納因得免罪士民德之尋卒於官貧無以斂巡撫史憫其有功爲措費護其喪以歸

陶文疇字中衍晚號蠡庵以明經任尤溪縣知縣以實心行實政殲三眼劇盜民賴以安邑民立祠祀之厯官工兵二部主事朱世平字可均以明經任廣東廣寧知縣值海寇劉香老之亂堵禦籌餉不遺餘力考績陞霑益知州州徵賦出土司逋則官受其絀世平示以威信始帖然知奉法後以繼立起訟獄上官納其賄多惑之世平力持不可竟左遷黟縣知縣釐革振刷弊

絕蠹清有黔兵假道於徽所在荼毒邑民阻截之以此觸鳳陽巡撫馬士英怒卽拂袖歸里晚年布衣蔬食徜徉邱壑非公事不謁邑宰王斗樞宰鍾陵七年臨別嘆曰前輩如朱可均眞古人所稱不可得而親疎者歟

舒顛字敬常號愚菴性警敏落筆數千言下帷益奮冬不爐夏不扇年二十領鄉薦甲辰第進士奉差江南巡按時魏府悍奴勢張甚道路側目顛抵任三月擒治伏辜留都稱快筠陽有獄久不決顛至秉筆立判誅止其魁活數十人在京師執法無所迴避權貴相戒勿犯及監神木廠主吏聞之膽落謂此木久經歲月虧折無算舒御史必不貸顛至則尺頭寸杪皆聽抵數時

進賢縣志

卷十八

人物

十五

巨猾據海鹽利爲亂屢征弗克至是都御史力推顛顛至微服往偵詐爲鹽客往來締交知賊誕辰乃命造小舟數十約載二人可負之而趨至賊境戒曰視予火起泊賊壽日宴飲甚酣首領以下皆醉鼾睡如雷乃命舉火衆雲集生擒元惡而還賊黨追奪而境甚險水陸不得並馳顛舟小遇山肩之遇川浮之及追至城令械賊置城上將戮之乃退尋擢中丞未行而卒公才十倍衆人每臨大事決大獄操觚執牘端然正色子弟侍側無敢咳唾者卒年四十二祀鄉賢

胡尚志字行之萬曆辛卯舉人乙未會試乙榜選授義烏知縣不就改貴溪縣教諭教士以禮法嘗聘校貴州鄉試得士皆名

俊著有禮記講義行世祀鄉賢

舒發字子愚少精舉子業壬子舉於鄉授樂清教諭表率多士具有法度遷開建知縣縣市肆屠牛舊有納稅陋規公禁之莫革或以告發曰法不容盡令不容驟惟示吾意旨所向耳邑有金礦奉禁不得採民多竊採而納其常規發悉擯之亦不窮究後兼攝封川調繁增城其爲治不苛細但持大體而已

國朝

朱徽字子美天啟辛酉與兄健同舉於鄉中崇正辛未進士歷官刑科給事中順治元年以原官陞都給事乙酉請告南歸壬辰以總督馬國柱薦復除吏科大計掌察秉憲大臣皆取平焉

進賢縣志

卷十八

人物

十六

轉陝西固原兵備道副使致仕歸負郭一椽不能旋馬所著有測蠡草及耕道集

朱紱字五任順治己丑進士選庶吉士改浙江道御史巡視七省漕務漕艘例有餽遺紱除之衆咸感勸運無愆期又視河東鹽課惠商革陋一如視漕之潔歷太僕寺少卿累遷都察院左僉都御史時江右漕艘逾期司農議改折紱爭之曰裕國必以粟且江右粟賤而金難奈何取其所無以苦之議遂寢致政歸里官橐蕭然清素無改

饒宇棊字型萬順治辛卯舉人壬辰進士授翰林庶吉士歷刑工兩科給事中丰裁峻整遇事敢言不避權貴如請核滯獄杜

鑽營叅庸劣諸疏皆剴切時事陞湖南按察司副使值歲饑捐金賑濟乞歸尋卒

舒旦字曉臣號麓蠡自幼岐嶷九歲能文十七入郡庠戊子之變三弟死於兵遺孤三人皆撫育之如己子甲午登賢書庚戌秋授新昌教諭內艱起補上饒教諭時民多逋累有司每以一姓之賦併責諸生多受褫坐圜圉旦力請學使爲分其籍士累乃甦更請太守構亭覆紫陽十碑併榻六經圖藏之秩滿陞撫州教授卒於官

章雲龍字從飛任仙居知縣有清操戢盜綏民勞績特著去之日老幼數千人號泣走送不絕

羅志

進賢縣志

卷十八

人物

十七

楊西狩字華觀南昌人進賢籍順治壬辰進士初任工部主事陞員外轉兵部郎中擢陝西提學道居官丰度端謹以清廉名卒於任所所著有存笥藁

羅志

舒香字理臣幼時母病割股以進母病尋愈讀書不守章句務爲有用之學雍正癸卯拔貢考克官學教習期滿任靖江縣知縣靖在江北三面環江香下車清案牘雪幽滯開誠布公與民更始暇則進士之秀者教導之授以經義性理捐俸修學宮備祭器又設官學延名師主其席手著條訓分授生徒文風丕振雍正十年海溢江水驟漲城不沒者數版濱江人民廬舍漂沒殆盡香不分晝夜親履村庄逐戶臨視給票散米先發而後請

上官頗以擅動倉廩相誚讓既而遣官查勘見香辦理井井民無阻饑亟爲嘉予甲寅大計將膺卓薦以逸囚被議改教久之選餘干教諭在任六年後致仕年屆八十而卒香性耿介不妄交遊獨與寧化雷鉉厚勸善規過互相砥勵鉉每語人曰吾閱人多矣三十年不作諛詞者惟兩水一人兩水其別號也著有浮梁近草曲水書院講義

羅志

萬青選字錢士號澎水家世寒微祖開仞有隱德青選生而岐嶷十載解聲律聞鄰塾講藝遂以意作八股見者詫異二十八縣庠授徒養親先意承志父歿拮据如禮撫諸弟曲有恩意雍正庚戌以孝廉方正科薦授國子助教陞戶部廣西司主事時

進賢縣志

卷十八

人物

十八

戶部有五虎七狗之謠青選獨持正有以金請託者峻却之又
有貲郎范某壽曰卿以下皆詣門致賀青選獨不赴未幾范坐
事下獄諸與往還者悉奪俸由是青選望益隆甲寅陞員外郎
尋除雲南大理知府大理爲迤西巖郡軍民錯雜號難治青選
丰裁峻整綱紀肅清人莫敢犯洱海暴漲壞田廬所屬太和陸
川趙州皆苦之青選按視海口淤塞急請帑疏濬且檄州縣發
倉貸糶民賴以濟雲南令汪某素廉恕不得於監司因以他事
被誣青選訊無實狀白其冤弗聽青選以去就爭之汪始獲全
又嘗辨郭氏疑獄斥土司之金而雪其枉一時翕然號爲神君
時青選母吳氏年八十青選每登蒼山望白雲泫然流涕遂以

終養歸歸年母卒又三年卒於家

羅志

舒寬字友嚴旦之子中康熙戊辰進士聞父病亟歸省日夕侍湯藥不頃刻離里人有以窘迫將鬻其妻寬止之爲計時給其食丙子銓歸化知縣會邑大饑亟發義倉粟賑之全活甚衆邑有奸民號十三太保者爲鄉里患捕得雜治皆抵於法莅任甫半載卒於官

羅志

熊均權字衡山二十七都人乾隆辛卯舉於鄉授廣東長寧知縣適鄰邑博羅永安二縣會匪不靖均權募士兵設法堵禦邑賴以安尋卒於官士民德之立主於邑城隍廟歲時奉祀

饒夢銘字訓明三十八都人乾隆癸酉拔貢授新淦教授陞隆

進賢縣志

卷十八

人物

十九

平知縣年餘童謠云縣官來了饒衙役盡蕭條旋丁外艱服闋選雲南思安縣知縣委署鎮雄州篆先是泰和縣人何任此有德政夢銘繼其後民咸賴焉因共建坊曰江右雙清陞普洱府威遠同知旋以繼母年老請養歸

傅猷著字紹先忠毅公七世孫生八年而孤孝友至性出就外傳聰穎異常十八補博士弟子員十九登嘉慶己卯賢書九上公車不第道光乙未大挑知縣簽發山西歷署交城長子襄垣汾西各邑皆有聲補神池兼攝五寨偏關篆地處極邊稱難治公設施裕如調猗氏平糧價以救饑民繕城隍以禦寇亂懸鉗鞫以察奸吏興講院以課生徒案無留牘獄少冤民治十年如

一日猗之人莫不家尸而戶祝之咸豐乙卯以卓異內陞太常寺博士紳民懇留格於例不行先是公出宰山右每以道遠不能奉養爲恨及補神池令始迎板輿焉及內擢母年已八旬遂乞病養母一官敝履兩袖清風淡如也丙辰秋兵部右侍郎王茂蔭疏薦循吏黃良楷等八人而公以晉省治行第一與焉奉旨令各督撫摭拾政事實蹟咨部引

見將不次擢用乃公適病沒於猗氏旅次闔邑遠近赴吊至爲之罷市初公新馬莊武王燧廟後有隙宇三楹紳民以爲公生祠歲時踞拜且千百人沒後四年遂稟請大吏奏咨入祀名宦祠

進賢縣志

卷十八

人物

二十一

儒林

宋

羅必元字亨父嘉定辛未進士真德秀入參大政必元移書曰老醫嘗云傷寒壞證惟獨參湯可救之然其活者十無一二先生其今之參湯乎初任咸寧尉轉崇仁丞福州觀察推官調餘干縣趙福王府中驕橫不法至是以汝愚墓侵奪民山必元爲直之淳祐中通判贛州賈似道總領京湖剋剝日甚必元上疏以爲蠹國脈傷民命似道銜之移汀州爲丁大全按去起幹行在糧料院錢唐有海鯁爲患漂民居詔方士治之都人鼓煽成風必元上疏力闢之度宗朝以直寶章閣兼宗學博士嘗從真

文忠公遊論格物克己及諸經講義簡實精詳竹湖李公韶薦之曰學有正傳見有定識晚年致政居北谷營數畝憩息自號北谷山人按白樂天故事自銘其墓卒年九十一

以下俱本省志府志舊縣

志

傅修朱子門人踐履純篤爲同輩敬重黃文肅公諡之曰誠孝先生

元

包希魯字魯伯號竹冠子七都人學問該博方伯連帥交聘不受嘗授古今文尚書于吳澄動履端嚴爲後進楷法其教人必先德行而後文藝士習一新所著有四書凡例易九卦衍義詩

進賢縣志

卷十八

人物

二十一

小序辨說文解字補義諸子纂言經史辨疑及原教說儒等篇門人傅箕王槐最著稱忠文先生子用夫實夫孫衍皆知名熊大元釗之父字元誠資性穎越卓然有志聖賢之學大肆力於周程張朱之書以上溯洙泗之原於詞章之習一無所嗜皇慶初科目興鄉邑用德學貢試不第乃曰儒者之務在傳聖賢之道究性命之蘊推教化之原立民物之命以克當天地之心歷遊四方求聞理學之要搜求濂洛關閩遺書凡有裨禮教者手錄以歸刊行之曰吾以是教不其廣乎又集儒先格言彙爲詩歌題曰養蒙大訓

明

包宏字用夫魯伯次子洪武初舉賢良以親老辭復以文學首舉辭不獲至京上問陰陽鬼神對稱旨奉使山西察苛政至洪洞縣官舍疾革大書於壁曰學傳乎道統心貫乎一德功被乎天下言利乎後世此君子之學也書畢正衣冠端坐而逝著有訥居集六書補義

舒綱字大中本陳姓自幼資性不凡成化辛卯以書經領鄉薦初試禮闈不第遂棄科舉之學礪志聖賢之道博究羣書洞見精妙卒業家居不干仕進父喪廬墓三年母老承順不違撫弟之遺孤恤族之婚葬動止語默恪有成規冠婚喪祭悉遵古典主教白鹿洞師教尊嚴志道堅剛律身清儉有古人風爲胡居

進賢縣志

卷十八

人物

二十二

仁高弟

舒芬字國裳年十二獻馴雁賦於知府祝瀚遂知名正德十二年舉進士第一授修撰時武宗數微行畋遊無度其明年孝貞皇后崩甫踰月欲幸宣府託言往視山陵罷沿道兵衛芬上言陛下三年之內當深居九重雖釋服之後固儼然瘡痍也且自古萬乘之尊非奔竄避難未有輕身而不嚴侍衛者又等威莫大於車服以天子之尊下同庶人舍大輅袞冕而羸車褻服是御非所以辨上下定禮儀不聽孝貞山陵畢迎主祔廟自長安門入芬又言孝貞皇后作配茂陵未聞失德祖宗之制旣葬迎主必入正門昨孝貞之主顧從陛下駕由旁門入他日史臣書

之曰六月己丑車駕至自山陵迎孝貞純皇后主入長安門將使孝貞不得正終之疑其何以解於天下後世昨祔廟之夕疾風迅雷甚雨意者聖祖烈宗及孝貞皇后之靈儆告陛下也陛下宜卽明詔中外以示改過不報遂乞歸養不許又明年三月帝議南巡時寧王宸濠久蓄異謀與近倖相結人情惶懼言官伏闕諫忤旨被責讓芬憂之與吏部員外郎夏良勝禮部主事萬潮庶吉士汪應軫要諸曹連章入諫衆許諾芬遂偕編修崔桐庶吉士江暉王廷陳馬汝驥曹嘉及應軫上疏曰古帝王所以巡狩者協律度同量衡訪逸老問疾苦黜陟幽明式序在位是以諸侯畏焉百姓安焉若陛下之出不過如秦皇漢武侈心

爲樂而已非能行巡狩之禮也博浪柏谷其禍亦可鑒矣近者西北再巡六師不攝四民告病哀號之聲上徹蒼昊傳播四方人心震動故一聞南巡詔書皆鳥獸驚散而有司方以迎奉爲名徵發嚴急江淮之間蕭然煩費萬一不逞之徒乘勢倡亂爲禍不細且陛下以鎮國公自命苟至親王國境或據勳臣之禮以待陛下將北嚮朝之乎抑南面受其朝乎假令循名責實深求悖謬之端則左右寵倖無死所矣尚有事堪痛哭不忍言者宗藩蓄劉濞之釁大臣懷馮道之心以祿位爲故物以朝署爲市廛以陛下爲奕棋以革除年間爲故事特左右寵倖智術短淺不能以此言告陛下耳使陛下得聞此言雖禁門之外亦將

警蹕而出安敢輕騎慢遊哉疏入陸完迎謂曰上聞有諫者輒
恚欲自引決諸臣且休勿歸過君上沾直名芬等不應而出有
頃良勝潮過芬扼腕恨完芬因邀博士陳九川至酌之酒曰匹
夫不可奪志君輩可遂已乎明日遂偕諸曹連疏入帝大怒命
蹕闕下五日期滿復杖之三十芬創甚幾斃昇至翰林院中掌
院者懼得罪命擿出之芬曰吾官此卽死此耳竟謫福建市舶
副提舉裏創就道世宗卽位召復故官嘉靖三年春昭聖太后
壽旦詔免諸命婦朝賀芬言前者興國太后令旦命婦朝賀如
儀今遇皇太后壽節忽行傳免恐失輕重之宜乞收成命以彰
聖孝帝怒奪俸三月時帝欲尊崇本生芬偕其僚連章極諫及
進賢縣志

卷十八

人物

一二十四

張璉桂萼方獻夫驟擢學士芬及同官楊維聰編修王思羞與
同列拜疏乞罷未幾復偕同官楊慎等伏左順門哭爭帝怒下
獄廷杖奪俸如初旋遭母喪歸卒於家年四十四世稱忠孝狀
元芬丰神玉立負氣峻厲端居竟日無倦容夜則計過自訟以
倡明絕學爲己任其學貫串諸經兼通天文律歷而尤精於周
禮嘗曰周禮視儀禮禮記猶蜀之視吳魏也賈氏謂儀禮爲本
周禮爲末妄矣朱子不加是正何也疾革其子請所言惟以未
及表章周禮爲恨學者稱梓溪先生萬曆中追諡文節先是修
撰羅倫以諫謫福建提舉踰六十年而芬繼之與倫同鄉同官
所謫地與官又同福建士大夫遂祀芬配倫云

舊志載舒文節著有周書定本又平生最慕周濂溪稱爲中興之聖著太極圖及通書繹義嘗曰心術與學術相符者也懷居與懷利相因者也怠勝敬欲勝義則其心死其學僞嘗扶母柩南旋至江中忽暴風危甚爲文以禱波濤頓息萬厯戊申建專祠於邑

附舒文節正德丁丑殿試策

舒 芬

制曰朕惟義農以下之事見於經秦漢以來之事見於史見於經者皆聖賢爲治之迹見於史者亦當時君臣相與隨時而成治者也然儒先君子之論則曰帝王以道治天下後世只以法把持之而已信斯言也豈帝王之治一以道而不以

法後世之治一以法而不以道歟自今觀之如畫野分州設官分職明禮樂興學校正律度秩祭祀均田賦通泉貨公選舉嚴考課立兵制慎刑罰則帝王之治天下固未嘗不以法也天性明達寬仁長者躬修元默以德化民恢廓大度同符高祖事從寬厚文以禮樂畏義好賢力於爲善聰明果決得於天性寬仁多恕心無邪曲恭儉仁恕忠厚惻怛則後世賢君之治天下亦未嘗不各有其道也然則儒先之論殆亦有不足盡信者歟洪惟我太祖高皇帝創業垂統治定功成聖子神孫萬代如見其治道之高明治法之宏遠直可以等帝王而上之矣然而帝王廟祀立於京師自昔忠良多與配享

雖以勝國之世祖而亦秩祀焉豈非以後世之英君誼辟其政治亦猶有可取者歟朕膺天眷命嗣守鴻業臨政願治十有三年於茲矣然遠師帝王之道而望道猶有所未見近守祖宗之法而行法猶有所未逮其故安在子大夫積學待問久矣其爲朕據經史兼本末詳著於篇朕將採而用之以資於治焉

臣對臣聞天下無法外之治帝王無道外之法蓋道者出治之本法之體也法者爲治之具道之用也使道有未純則所以立法者義必不精利必不盡雖能行於一時而不可垂於萬世法有未善則所以爲治者化必不洽澤必不周雖或致

夫小康而終不足以望雍熙泰和之盛故論治而謂不以法非知治者也論法而謂不以道非知法者也古之帝王全於躬行心得者既有以建天下之極見於典章制度者又有以盡天下之情故功業之盛上下與天地同流而非後世之所能及也秦漢以來非不有法也類皆小補罅漏而不知先王立法之原亦非不有道也乃其天資偶合而不聞先王大道之要尚何望其治效如古昔之隆也哉然則治之不能外法法之不能外道蓋有確乎其不可易者矣恭惟皇帝陛下篤於求道審於行法勤於致治踐祚以來嘗三親策多士矣始之以法天法祖蓋篤於求道之心也繼之以文武兵農蓋審

於行法之心也又繼之以大學衍義之問蓋勤於致治之心也茲於萬幾之暇復進臣等於廷兼是三者之心俯賜策問惓惓焉若有所不足而欲益臻其極者臣雖愚陋敢不對揚休命於萬一乎臣聞羲農治之極也堯舜道之至也三代法之備也言治極則法之善可知言法備則道之純可知故孔子繫易始於伏羲則十三卦之制器利用以法而存乎道也序書而斷自唐虞則二典之所載時雍風動以治而形乎法也刪詩而備於文武則天保以上治內采薇以下治外是又以道而顯設之於法也子思曰仲尼祖述堯舜憲章文武朱熹釋之曰祖述者遠宗其道憲章者近守其法豈堯舜不足

於法而文武猶病於道邪蓋舉道則法以著舉法則道以存故朱熹又曰皆兼內外該本末而言也由是言之道與法非判然二物也明矣聖制以爲儒先君子之論則曰帝王以道治天下後世只以法把持之而已信斯言也豈帝王之治一以道而不以法後世之治一以法而不以道歟聖慮深遠臣愚何足以知之然竊惟帝王之與後世其爲道不同而其爲法亦異帝王道足以創法法足以善治故專謂之道蓋道卽法之所從出也後世之於道或偏而未全或駁而未純則其所恃以爲治者獨法而已故專謂之法蓋法始有不本於道者矣請因聖制所及以凡經史所載道與法者敬詳陳之聖

人理天下使物各得其所爲極至故其盡制曲防莫非美意存焉今舉其大者若黃帝之畫野分州舜肇十有二州禹弼成五服咸則三壤商人肇域四海以建諸侯周人以九州之地建三等之國而分田以定賦者或五十而貢或七十而助或百畝而徹皆以什一爲中正則封建井田之法於是乎立矣伏羲以龍紀官神農以火紀官黃帝有天地四方之官唐虞建官惟百夏商官倍其數周官三百六十統於六卿而敷奏明試三考黜陟與夫六計八職八柄之政亦行乎其間則建官考課之法於是乎詳矣親疏貴賤之有體郊社禘嘗之有儀咸英韶濩之有制璇璣玉衡之有具塾庠序學秀選俊

造之有等則禮樂律度學校選舉之法無一之不備也九賦以爲斂九式以爲節五刑以爲討八刑以爲糾弧矢以示威伍兩卒旅軍師以蓄衆則貨財兵戎刑罰之法無一之或缺也所以然者羲農黃帝皆以神聖之德繼天而主堯舜禹湯文武數聖人者或克明峻德或溫恭允塞或肇修人紀或緝熙敬止或重民五教道無不純而法於是焉出不然亦安能心代天意身代天事妙化導之機而極制作之善若是哉故曰帝王以道治天下而臣謂道卽法之所從出者於是可見矣後世賢君若漢高之天性明達寬仁長者以創漢家之業文帝之躬修元默以德化民而致後元之治光武之恢廓大

度同符高祖成中興之功章帝之事從寬厚文以禮樂濟永平之政唐太宗之畏義好賢力於爲善速致太平憲宗之聰明果決得於天性卒平禍亂宋藝祖之寬仁多恕心無邪曲而有以易五季干戈之亂仁宗之恭儉仁恕忠厚惻怛而有以開元祐炎興之運誠如聖制所謂亦未嘗不各有其道也但此之謂道不過天資之近似耳就而論之則惡聞詩書崇尚黃老溺圖讖以蹈封禪之非乏剛斷以啟戚門之釁以至天倫慙德異術荒心任智謀以成功聽讒倖以廢后帝王純粹之道果如是乎道既未純則法之所立宜乎其不能盡善也故漢初三章之約律令之次章程之定與夫侯國之封所

謂磐石之宗犬牙相制者規模亦宏遠矣然不革秦習不任周政所以治雜於霸其後禍難屢起亦非法之所能防也唐以六典建官以租庸調取民增置學舍生員以養士與夫以府衛治兵所謂居重馭輕五大不在邊者節目亦詳盡矣然大綱不正昏風相襲所以治理未臻其後變故最多法亦屢壞而不可支也宋人重儒術愛民力以文臣知州以朝官知縣以京朝官監臨財賦與夫通判縣尉之置要皆以收方鎮之權所謂混一天下亦長慮而却顧矣然武備頗衰成功亦小國勢日以積弱莫能善其後也故曰後世以法把持天下而臣謂法之不本於道者夫豈不然耶以是觀之則道有純

否而法隨之法有善否而治因之孰謂爲治可以無法而立法可以不本於道哉洪惟我太祖高皇帝膺天眷命勘亂開基一代經制之備真足以匹休帝王而開聖子神孫萬世之太平矣觀夫京畿諸道之建置宗藩列爵之世封內則罷丞相而設府部外則罷行省而設三司有大明官制以定其員有諸司職掌以定其守命官議禮則吉凶軍賓嘉之禮有其等矣而又有禮儀定式諸書以示其品節制度焉命官作樂則郊社宗廟朝廷之樂有以章矣而又有太常神樂諸署以習其器數聲容焉內設國子監以教天下之英才外設府州縣學以育民間之俊秀經義之制定而士無詭異之談科貢

之制行而士有彙征之望以言乎律度則欽天有官而閏餘歲差之有算司天有臺而休徵災異之並占且謂至元辛巳之書漸違天度遂以洪武甲子之歲肇起天元律度之正何如哉以言乎秩祀則大而郊廟儀物典於太常小而厲享品節詳於祠部正嶽鎮海瀆之神號革前世不經之淫名帝王陵墓三歲一降香祀之先代賢臣惟以當時官爵稱之祀典之正何如哉謂田賦不均非所遂民生也國初丈量田畝以抑兼并清理田糧以防姦僞且視土地之肥磽以爲稅科之輕重是雖非井田也不幾於什一之中正乎謂泉貨不通非所以資國用也國初因桑穰之饒而鈔法甚嚴置寶源之局

而錢法再變茶馬鹽課之利則以助軍需商稅魚課之辦則以助國費是雖非帑餘也不幾於九府之圜法乎禮部以科舉之式選士必嚴貢舉非人之律吏部以銓選之法選官復有推陞保舉之例其選舉之公彷彿乎虞周明揚實與之盛也給由雖有常期而所以爲黜陟者復稽其旌異之典紀錄之冊焉考覈雖有通例而所以校才能者復稽其歷任之久暫地方之繁簡焉其考課之嚴頡頏乎虞周三考六計之詳也以兵制言之既有親軍諸衛以衛宮禁復有隸府諸衛以衛京城既有都司留守司以衛一方復有各衛守禦所以衛郡邑且府衛之所職掌雖各有司存而軍政之樞機實由於

兵部蓋統重馭輕之中寓防微杜漸之意此我聖祖親歷戎行灼知古今利病而爲是良法昔人謂其軍政有統真知言哉以刑罰言之大明律之綱有六而其目止於四百六十大明令之綱亦有六而其目止於百四十有五焉是雖因唐制而定五刑其間別比類異簡而易遵明而易曉蓋我聖祖斷自宸衷務在直言其事庶幾使人易知而難犯昔人謂其有象刑欽恤之仁真知言哉夫一代經制之備如此豈偶然而致之哉蓋有本於其間矣臣嘗莊誦聖祖之言有曰朕求帝王之治莫盛於堯舜然觀其授受在允執厥中又曰人君一心治道之本存於中者無堯舜之心而欲施於政者有堯舜

之治不可得也大哉王言非真有得於帝王之道能如是乎
宜其創制立法盡善盡美於以致雍熙泰和之盛直等帝王
而上之矣聖制又謂帝王廟祀立於京師自昔忠良多與配
享雖以勝國之世祖而亦或秩祀焉豈非以後世英君誼辟
其政治亦有可取者歟蓋自洪武六年定歷代帝王之祀自
伏羲以至元世祖凡十有六君皆以其開基創業大有功德
於民耳若周文王雖基周命終守事商之節唐高祖雖君天
下皆賴太宗之功故不祀焉伊尹之告其君曰七世之廟可
以觀德聖祖秩祀帝王之意不在茲乎二十一年定名臣從
祀自風后以至赤老温凡三十有七臣皆以其始終全節與

有功德於民耳謂宋趙普雖曾有微勞然實深負於藝祖元
安童雖信有勳德然難並列於先臣故不祀焉盤庚之告其
臣曰茲予大享於先王爾祖其從與享之聖祖秩祀名臣之
意不在茲乎故程頤之論治獨歸於帝王而常不足於後世
者天下之公言也聖祖之秩祀並隆於帝王而亦不遺於故
元者王者之大度也且以前世功德固有當崇而後人監戒
亦所攸視聖意亦何深遠哉聖制之終有曰遠師帝王之道
而望道猶有所未見近守祖宗之法而行法猶有所未逮其
故安在且欲臣等詳著於篇將採而用之以資於治臣雖愚
陋敢無一言以對而徒進諛詞曰道則至矣盡矣治則已臻

皇極法則無可議者矣獨不有以來曲學之誚而上負聖明待士求言之意哉臣竊觀今日之天下州野如舊而民生之憔悴日甚官職如舊而事功之廢弛日甚禮樂如舊而奢僭漸形和氣未洽也學校如舊而道術漸乖士習未端也律度正矣而能以災異當畏爲陛下陳之者誰歟祀典正矣而能以異端當戒爲陛下關之者誰歟田賦之均如舊也而額外之征求無已泉貨之通如舊也而關市之稅課日增選舉之法具存而賢才之疏遠者未伸考課之法具存而庸劣之在位者未去兵制雖不改乎舊也然強壯役於私門恩賞奪於有力其能弭怨讟之叢積乎刑罰雖不改乎舊也然怙終之

罪不加羅織之風未已安能止物議之沸騰乎夫以天下之事每每如此則是聖祖之法雖善而今之所存者蓋文具耳孟子曰徒法不能以自行意者陛下之望道誠有所未見歟臣願終其所欲言以副陛下之所欲聞而無復有所隱也竊惟帝王之道大矣臣愚不能究極今陛下以程頤之言爲問臣亦敬以程頤之言爲獻其言曰爲政須要有綱紀文章此卽臣所謂無法外之治是也又曰必有關雎麟趾之意然後可以行周官之法度此卽臣所謂無道外之法是也陛下誠能重人倫之始審王教之端如文王之雝雝在宮無斃亦保則關雎之化其庶幾矣圖國祚之綿洪計宗祧之嗣託如文

王之振振公子以永姬籙則麟趾之化成其庶幾矣關雎麟
趾之化成則至於兄弟御於家邦而道無不純有以匹休帝
王而增光祖宗之道矣道既在我則不聞亦式不諫亦入而
法無不善有以匹休帝王而增光祖宗之法矣夫道無不純
則風化鼓舞者有其機法無不善則轉移闔闢者有其具致
祖宗帝王之盛治又何難哉是則陛下之所宜加意者誠不
在於多方也伏願少垂天聽克廣德心不以臣所陳之言爲
謬而聽之惟聰不以臣所陳之事爲易而行之惟力矜持敬
畏不少間斷清燕之優遊無異於大廷之臨蒞便嬖之使令
不忘乎儒紳之對則道可純法可善治可久宗社幸甚天

進賢縣志

卷十八

人物

三十四

對
下幸甚草野之人不識避諱冒干天威無任隕越之至臣謹

萬浩字汝孟嘉靖進士授編修奉使唐藩不受餽遺遷國子監
司業手譔文武講章分授生徒穆宗幸大學浩講易乾大象敷
陳明晰上大悅受五品服以左諭德掌南京翰林院事尋轉南
國子監祭酒訓士先德行而次文藝翕然化之升南京禮部右
侍郎會請互市移書當軸者力爭不得遂致政歸家居蕭然無
片牘於公堂至民生利病輒反覆不諱著有湖窻稿中秘讀書
錄內翰稿軺槎集留院留部留雍稿太學日錄

傅應期字愧石幼有至性祖母吳病侍湯藥不少懈祖母憐之

至爲忍痛萬厯戊午鄉舉授順昌縣知縣寓撫字於催科凡訟者勸其息爭隨以禮直之務使平情而已涖任一載盜散民安會楚王造錢商賈苦之應期具啟力爭以鼓鑄爲害遂忤藩歸撫按連章薦起原官補宣化知縣陞太僕寺卿尋致政嘗曰敦五倫乃爲實學舍一貫皆是異端銘其座右曰大道一貫曰忠曰恕君子持己必敬必恭其學如此卒祀鄉賢

以上舊志

夏荆璞號卜門邑庠生十六都三位村人學問淹通而克敦孝友居恒嚴毅端莊絕無苟且數十年未嘗一至公庭偶有所出亦必衣冠整肅繩趨矩步望之儼然設教閭里訓諸子以愛之誠非徒文貌故遊其門者咸知務本之學而造就多士歲置

進賢縣志

卷十八

人物

三十五

一册每有所爲必書之以自警至老猶戰兢弗衰年六十有八

而卒

採訪册

張心嚴字整夫號勉哉歲貢生七都人外恂恂而內剛正和以待人然亦守正不阿好讀書面壁功深屢膺鸚薦因一字之悞擴之惜哉平日教人子弟先德行而後文藝循循善誘類多成材及門之士食廩餼登賢書咸以謂能自得師也

採訪册

忠節

宋

羅一理字循叟咸淳鄉舉謝枋得爲江西招討使舉兵恢復一理偕弟起潛赴義受擒不屈皆腰斬起潛臨刑顧一理曰今日得死所矣旣歿面皆如生

以下俱本府志舊縣志

樊昌時建炎初以書生爲閣門祗候舍人王虎謀逆駕巨艦欲陷洪州昌時偕弟昌盛率鄉民力戰從兄昌諤捐貲以佐兵費昌時昌盛及昌諤子士通俱死之虎亦敗衄紹興初府帥高衛以事聞贈昌時修職郎昌盛保義郎封昌諤爲修職郎鄉人廟祀之

進賢縣志

卷十八

人物

三十六

王用龍字震叔博覽書史德祐丙子宋亡時謝枋得招諭江西用龍檄衆往附之其詞曰以燕人而伐燕全趙璧以歸趙爲元鎮守兵所獲用龍欲自經守者奪其索家人饋食至碎磁劑吭而死

元

樊明仲崇禮鄉人幼警敏好學有志至正間寇攻郡城江東之黨操舟應之明仲率弟文仲姪用行 兵北山下寇攻北山明仲率衆力戰獲其渠魁寇黨乃潰未 寇復攻明仲與寇黨復戰於新墟力不支與從弟文仲從姪 行死於新橋藩府以事聞贈明仲爲進賢縣令文仲爲臨川丞用行爲崇仁簿有司爲

立節士祠以旌之時同死事者有陶正道傅煥章饒思舜則志熊有源陳伯通徐宏道劉清公沈壽葉遠兄弟十一人

附載

樊致仲禦紅巾力戰而死二子俱被虜孺人涂氏因尋二子死於餘干壻支孟淵輿柩歸葬梧山

樊商霖討紅巾賊死節北山同與難者七十三人

徐思德遇龍孫並儒者奮倡義兵祀龍溪節士祠

伯顏子中其先西域人後仕江西遂家焉子中明春秋五舉有司不第行省辟授東湖書院山長遷建昌教授江西盜起授分省都事使守贛州而陳友諒兵已破贛子中倉卒募吏民與鬪

進賢縣志

卷十八

人物

三十七

城下不勝脫身間道走閩陳友定素知之辟授行省員外郎出奇計復建昌浮海如元都獻捷持節發廣東何眞兵救閩至則廖將軍永忠已降何眞子中跳墮馬折一足致軍前永忠欲脅降之終不屈義而舍之乃變姓名冠黃冠遊行江湖間太祖求之不得簿錄其妻子子中竟不出久之事寢解乃還故里洪武十二年詔令郡縣舉元遺民將官之不應者論重辟布政使沈立本密言子中於朝詔以幣聘使者至子中太息曰死晚矣爲歌七章飲酖而死

明

傅冠字元甫本名元範祖炯南京刑部尚書天啟二年舉進士

第二授翰林院編修會璫焰方熾超然自遠不邇權貴崇正戊辰陞侍讀學士分校禮闈稱得士時典誥敕薦歷左春坊左中允直平臺記注經筵日講輪講通鑑 亂德一章閣臣諱之

復改擬以進冠曰聖主遜志學古參 忽可諱哉仍進講本

章上霽容嘉諭曰講不避諱直也陞左 德册封周藩癸酉陞

春坊庶子與文震孟同纂修熹宗實錄甲戌以少詹事分校房

闈得人如前陞北雍祭酒即請宏選舉修太學汰冗冒俱奉俞

旨教習翰林庶吉士時以經濟相勗勵尋陞禮部右侍郎丁丑

充實錄館副總裁上御經筵以至誠盡性章進講上嘉納之陞

禮部尚書兼東閣太學士時朝士多植黨與相媒孽冠謹愿恪

進賢縣志 卷十八 人物 三十八

恭中立不倚以故上眷獨隆後以誤判章奏引罪放歸甲申三

月報至號痛骨立為位賦詩而哭併弔李公邦華倪公元璐馬

公世奇諸君子唐王時以原官督師江西江西失守走泰寧門

人汪亨龍執而獻之有司殺之汀州血漬地久而益鮮所著有

寶綸樓集 臨刑賦詩幻影落紅塵倏忽成今古名義重如山此身棄如土四顧環刀戟展轉不得死矢念終不移皎

日有如此 又采錄江人事

傅冠字子京號寄菴進賢人刑部尚書炯之孫也初名元範中

萬歷丙午鄉試第二名後易名成天啟壬戌一甲第二名進士

授翰林編修崇貞戊辰甲戌兩分考禮闈充經筵日講官纂修

國史記注起居撰誥勅文及册封周藩皆稱職丁丑入內閣為

大學士戊寅予告馳驛歸里第賜賚有加甲申之變在籍詞臣
劉同升楊廷麟倡同鄉起兵冠捐貲佐軍興乙西南都覆金聲
桓脇降江省冠憤發謀匡復會益藩治兵遣人以書招冠冠棄
家赴焉王體忠者本闖部將既降

大清遂乘勢破撫建益藩出奔旋師進賢執冠長子鼎乾殺之
家焚洗已唐王建號改福州爲天興敦趣冠赴之因問道八
陛見加太子太保賜舟楫救時銀章五日一入朝裁決諸務已
復賜尚方劍出督師遂率中軍蔡鼎國姓成功總兵郭燧陳秀
進發丙戌三月師次邵武陳郭二旅駐永定湖東道陶文疇出
關次瀘溪募集士卒進止歸畫一出冠既屢捷會蔡鼎違節度
舊屬罪廢官江隨日旭星華等潛導

進賢縣志

卷十八

人物

三十九

戊戌補刻

師喪於永定關守關把總袁體忠戰死體忠邵武人五月冠避
地泰甯鄉秋八月閩都失守王出奔冠聞謀集標將往扈駕有
舊屬罪廢官江隨日旭星華等潛導
大兵千騎搜冠家家丁真義戰不勝冠知事不可爲整冠帶自
縊未死

清兵入抱持之解其繫勒薙髮不可副將許遇明嚴兵衛守之
冠展轉不獲死所已解往汀夜宿溪頭雨如注冠私赴水守者
覺沮之因賦詩見志曰依稀惶恐灘彷彿零汀洋我心如止水
誓死爲綱常沿途惟手文信國一編不置比至汀在營已兩越
月終無回意時 貝勒乃出

旨以成其志更恐之曰弗順則死矣冠奪

旨裂碎投地大呼曰高皇帝有靈我必能於冥冥中報國也遂往就刃汀父老子弟見之皆發聲哭爭解衣歸襚移厝山陽妾蒲氏亦不辱死

唐王以丙戌八月二十一日至汀州 大清兵追執之死於

福州 眉間舊評

查閩李元仲寒支集有傳相公傳視此尤詳而閒有小異處今脩錄而互存之其傳曰公諱冠字某別號寄菴江西進賢人也初名元範中萬厯丙午科鄉試第二名後易今名中天啟壬戌進士傳臚第二人厯官十一任拜禮部尚書兼文淵

進賢縣志

卷十八

人物

四十

戊戌補刻

閣大學士崇貞己卯累疏乞休詔許馳驛歸里家居者六年福王乙酉夏 大清兵渡江三鎮叛降江西淪潰闖之餘孽王得仁者領 大兵突入進賢據住公宅掘取積藏凡數世誥命賜物蕩然一空殺公嫡孫鼎乾掘公祖墓燬家廟公潛入閩中時唐藩起事福州改元隆武聞公至差官存問累詔趨公受事次年丙戌三月手詔公督師恢復江省專理湖南勦撫事宜賜尚方劍便宜行事師臨邵武前軍抵建昌界而餉已告匱後軍逗遛不前遠聞警報輒撤營歸公知事不可爲十二疏乞罷適泰甯薦舉職方江隨者以進身岐路思立名自重疏論公擁兵糜餉玩敵擾民公辭解兵柄遂詔杖

江隨而亦許公謝事還山因寄寓泰甯門人江亨龍家亨龍
壬人也初以閣部名擎曲執弟子贄丙戌九月 大兵分道
由江西八邵武泰甯公復避泰之分水邨卽亨龍莊居也亨
龍同子養源私計公常握重兵 大清索公必連居停不
如自首乃免於是 大清果索公養源遽造公告急曰江
隨父子白滿帥必生得公矣源家百口公是視耳公信之蓋
江隨前有爲公受杖事養源因以此中公公迄死不悟爲亨
龍所賣也但曰一死報國吾事已畢鼠子嚙肉所得幾何徑
自投縲養源跪抱公曰公不生見 清帥者江氏百口立碎
矣旋指莊客輩曰卽此族何辜忍令爲血池乎於是莊客數

十人競縛公就輿旣抵大營大帥李成棟親解縛延公上座
相勞苦執禮甚恭間進曰公大臣也釋留當取 旨非成棟
所專顧國法難令特嚴異令以逆論倘委曲相從者成棟保
公無他此後攀鱗曳尾惟公之便公詫歎曰自冠裳以來曾
有髡頭宰相否居久之成棟復進曰公髮種種矣與髡何異
但稍加鉞掩眾目卽當婉曲報聞耳公厲聲拒之成棟自是
不復言然待之甚謹夜宿溪頭公私起欲投淵爲守者所覺
而止宿石牛關搶頭欲死守者復阻之遂護衛至汀州起居
飲食成棟必偕成棟旣率兵入東粵汀州鎮將李發復衛公
如初一日對弈局罷發閱文書忽請曰公必不順 清者

今奉 旨收公矣公欣然起曰早畢吾事汝之賜也整衣冠向南拜曰臣負國無狀死不足贖復向西拜曰祖父暴骨惟冠之辜慚見先人地下當是時鎮卒皆涕落無忍加刃於公者雖賞之不從也惟汀州太守李友蘭家丁二人受賞而施刃焉公遂授首函寄汀獄蓋丙戌十一月二十一日也是日晝晦悲風震瓦汀人無不茹涕者家人傅國貞等負公骸權葬於汀州之羅漢嶺與忠誠伯周公之蕃墓相望公首在函者時或無故動搖其地凜如霜雪不寒而慄丁亥五月間忽吐白光中夜如旦數見夢於獄囚之冤濫者獄囚祈卜皆奇驗牲醴拜奠遂無虛晷己丑三月公之子來乞骸歸葬得

請始合身首而更殮之竟體皆作黃金色異香遠聞舊衣二領弃墓側者風雨經年帛色如故行道傷之咸指曰此相公衣也無忍動者冬十二月甯化邱賴數生弔公舊墓見遺衣儼然被襲而歸每示人曰此經水土風日厯歲不能敗者是亦有神也蓋有歎且泣者初分水就執之日公歎曰負國重恩永慚泉下奈何奈何以足三頓地夜半風雨大作所頓足處崩陷十數丈云按乙酉之焚洗公家者髻山此傳作王體忠寒支作王得仁蓋此時得仁尙屬體忠部將似仍書作體忠爲是至此傳竟謂江隨等潛導 大兵執公得寒支傳乃知爲亨龍之嫁誣也寒支集自是傳信之書且以閩人紀

閩事爲得其實故明史亦謂亨龍執而獻之有司也但明史作汪亨龍寒支作江亨龍

此傳謂闖孽殺公長子鼎乾寒支以爲嫡孫凡此俱係傳聞互異者未詳孰是又查新建萬亦尹文集中亦有公小傳云公工楷書有趙松雪筆意所著有寶綸閣集其死也門人枕屍哭猶見公張目握拳鬚髮蝟磔者移時明史亦謂冠就刃汀州血漬地久而猶鮮云明史卻無冠專傳只附見賀逢聖傳後寥寥數語省志從之亦未及有所增益髻山此傳差備始末然俱不及寒支之寫生也故著其詳於此

附傳冠天啟二年壬戌科廷試策

進賢縣志

卷十八

人物

四十二

戊戌補刻

臣聞帝王之首纘鴻圖也必有紀綱萬世之道明示以蕩平之皇極使一張一弛者妙合陰陽之運斯朝廷之法紀日新必有磨厲一世之神默持以競業之主宰使剛克柔克者同歸操縱之權斯宇宙之精神日振道於何標舉天下之利弊兩途悉準於可久可大之模而無狃近功無循故事參同而不妨其異通變而不戾其常是蕩蕩平平之道也神於何操舉穆清之經緯萬端悉準於惟精惟一之中而無塗耳目無飾聲容繼離而益濬其明體乾而不圉其健是兢兢業業之神也道而不提挈於神則上怠而下玩卽文網日密而實意日疎神而不運量於道則上矯而下匿卽虛文日侈而實政

曰壅故處席慶蒙休之日不可有席慶蒙休之心凡所爲敷
賁乎前猷張皇乎聲氣者一視乎見用之精以自調其化瑟
計久安長治之策必宜有久安長治之心凡所爲補苴其罅
漏鬯洽其脈理者一視乎綢繆之計以永固其金甌從古聖
帝明王制治保邦上下慶光明之運柔遠能邇中外貽安輯
之休道端不出此欽惟皇帝陛下峻德欽堯溫恭協舜夙成
睿智敬成茂緒於方新洪受丕基光啟大明於重朗奉先思
孝則首崇追遠而瑞啟猗蘭爲政以人則典隆爰立而功資
作楫詔書甫下父老扶杖以觀纒纒灑中天之澤講帷時御
侍史含香以奉翩翩漱東壁之華蹕無拘於雙日凝旒藻冕
時看香案捧紅雲闔不隔於九天持斗握魁日覩公車飛白
簡轉圓賜復龍不伏而鳳不棲黎獻破煙霞之癖揮金發帑
士不呼而民不擾疆場深挾纊之恩是誠三善之德無待齒
胄之餘哲命之貽聿自嗣服之始自是歌敘歌呼威靈震濯
可以舞干羽於兩階調玉燭於萬世矣迺尤進臣等於廷俯
賜清問慮周於文武之分途思深於政教之日靡席奠孟之
勢而益勵復隍之憂抱集蓼之懷而早預徹桑之戒居然韜
鐸而求之意也臣草野何知奚足補高深於萬一然杞人漆
室懷忠而願効有日矣敢不悉心爲明廷獻臣竊聞天有時
雨之用主於生物而殺之道存焉天有漂霜之用主於殺物

而生之道存焉生不廢殺殺以成生並運而莫究其端迭施而不測其用故曰張而不弛文武弗能也弛而不張文武弗爲也夫以天下之大方域之廣非文德無以釀武功之略非武功無以維文德之衰禹曰文命而必曰不距朕行湯曰聖武而必曰彰信兆民謨烈之聖極於成周而繼體纘承者不曰張皇則曰克詰其持世導民何至赫奕耶恭惟我太祖高皇帝肇造區夏一洗故元之穢成祖文皇帝載奠邦家聿清宇宙之氛當其時日與二三大臣入而揚擴經術出而奮勵軍容文治光昭於雲漢威靈震疊於雷霆固與虞夏殷周媲美比烈矣奕葉纘承闡謨繹緒卽疆圉小警不難滅此而朝

食固萬世永賴而無弊者也我皇上以冲齡而嗣無疆之景運劬勩而撫新造之洪基仔肩負荷未聞以撥弓曲矢而僥倖於稱能遺大投艱未聞以塵飯塗羹而苟且於嘗試如玉之方剖於璞他山之攻勿以懸藜結綠棄焉如劍之方發於硎越石之砥勿以豪曹湛盧舍焉惟是講學勤政親賢愛民簡將治兵爲大務夫何烏合蟻聚逆我顏行海甸騷然宵旰日亟漂搖已至共狎處堂之安戎馬生郊竟乏師中之吉局內有元黃之戰當關無虎豹之形甚者法令星懸而玩愒如故威嚴霜肅而規避如故有如明問所云政事隳而文德闕聲容盛而武功弛不其然歟臣伏而思之今日之禁旅無亦

象人而隸籍者也今日之班操無亦傀儡而逐隊者也卽列第專閫者共懷拮据之憂而且欲乞將於河魁借兵於太乙卽區區一調發一僱募雖時事之不得然而調發僱募亦數年於茲矣迺迄無成局其故何耶臣爲今日之人心大抵有意氣而無精神有異同而無可否有體面而無法度則今日之事勢大抵顧盼多而擔當少嘗試多而萬全少議論多而成功少則齊管仲所云輕與人政而重與人馬輕與人軍而重與人玉重宮門之營而輕四境之守未必非今日之弊政也昔宋朱熹有云其本不在威強而在德業其任不在邊境而在朝廷其具不在衣食而在紀綱未必非今日之急務

也弊者速汰之則操文墨者毋制師中之緩急居閫外者毋侵當局之便宜乃爲禦侮之長策急者早計之則行軍之都護當有專權而紀覈之監司當有成議乃爲治標之急著亦惟我皇上運日月之明法雷霆之斷綜功罪而核賞罰省議論而一事權則文武有竝御之功而安攘有畫一之致何至屢拙而不可收拾哉此臣芹曝之念仰祈天子光前裕後之令圖折衝樽俎之長略而不能已於狂瞽之瀆也抑臣猶有說焉治亂之政不當問於鳴劍呶唔者而當問於慎位安正者不當問於僚庶紛囂者而當問於神明中處者心是也心之虛靈天空日霽能爲五官主自能爲百度貞出入起居罔

不欽也而媒越蠹形怠荒蠹神必嚴閑而豫飭乃爲提躬之實詣日就月將罔不勤也而邪正相妨暴寒可慮必幾先而密證乃爲端本之要務如是則實政日操繁言日省於以收郅治威嚴之效何有哉遐念先帝以爲堯爲舜之休叮嚀於玉几之憑我皇上紹聞德言琅然在耳惟以精一之心常運而不息則身日強固德日強明自可追踪唐虞媲美殷周同維祖宗之泰運將億萬年於斯而日升川至寧有量哉臣草野不識避諱干冒宸嚴不勝戰慄隕越之至

饒元珙字仲璨崇正癸酉舉人授工部主事歷官郎中繕營房飭守備勤慎罔懈司廠臨清相沿陋規革除畧盡解組歸戊子

進賢縣志

卷十八

人物

四十七

兵亂元珙被執子宇柎急出請以身代父子俱死所著有經書實義性理傳薪錄

龔仲泰崇正甲子舉人崇仁教諭巡按再以邊才薦授湖廣荊州府歸州牧是時全楚被賊殘破仲泰奉命不顧逕馳赴任廨舍俱燬借僧寺視事撫集遺民激勸多士衆心翕然會楊嗣昌督師會勦軍需緊急仲泰身履行間芻蕘糗糧晝夜拮据以濟鬚髮盡白加以旱蝗催科撫字智力俱窮修廢補缺昏旦孔棘所恃忠義感激窮黎効命國家而已後嗣昌入蜀逆賊乘釁荆襄失守夷陵隨破仲泰力嚴守禦與李百戶坐卧城上捍禦時馬賊守夷陵分遣蘭路兩賊率兵渡江過歸州土豪吳繼廉張

化龍等縛仲泰獻賊賊好言撫慰仍斬吳張以說降仲泰不屈賊怒將刃之而百姓哀號無傷我仁廉父母賊心動乃轉送夷陵馬賊諷之曰人生何處不富貴而自苦如此仲泰閉目不應遂轉送襄陽李賊令付前營收禁時遣人蹈以高爵叱曰汝刀鋸吾不畏爵祿吾不屑自受任初此身已許朝廷豈降賊耶賊雖怒而終不加害仲泰百計求死不得至是守者稍懈遂觸死營中時崇正十六年二月九日也賊聞歎息不已其僕職書乞遺骸許之乃焚化由間道負歸仲泰子庠生煥述其事爲忠節記

梅獻後三都人萬曆癸卯以左營叅謀出師福建卒於陣

進賢縣志

卷十八

人物

四十八

國朝

傅宏烈字仲謀順治二年舉人由縣令擢韶州司馬陞陝西慶陽府知府首發吳三桂逆謀言宜早爲備時三桂反形未露部議以離間王大臣逮治論死

特旨減免流戍廣西梧州康熙十三年冬吳逆據雲南反明年廣西鎮守將軍孫延齡叛降於吳逆遣提督郭懋禕捕宏烈甚急欲生得用之宏烈投水求死懋禕援出之送延齡所宏烈諭以大義且策三桂必敗延齡始有悔心令往南寧聯合交趾接應

王師以圖反正吳逆僞黨四布延齡令密爲計宏烈因受僞將

軍職得以出入賊黨十六年五月乙酉移書廣西巡撫麻尔吉
陳賊可滅狀疏奏

詔授廣西巡撫七月加撫蠻滅寇將軍是月宏烈疏奏親統官
兵於韶州地方擊敗賊衆斬殺甚多生擒僞總兵王雲龍等八
月癸亥疏言臣率官兵進取廣西僞將軍趙天元等擁衆萬餘
據守梧州出城迎戰我兵水陸奮擊敗之遂復梧州趙天元等
僅以身免是月又疏報逆賊侵犯梧州臣遣總兵楊國泰分布
官軍水陸並勦前後夾擊大敗賊衆於昭平等處地方陣斬僞
總兵張元乘勝追北本月初三日恢復潯州府並獲賊船器械
十月疏報楊武營總兵官曾大職勦逆賊於五屯所地方殺獲

進賢縣志

卷十八

人物

四十九

甚多恢復南平縣丁未疏報平樂府昭平縣距省不遠爲賊犯
梧潯出沒之地臣遣標下後營叅將周光裕率兵進取擊敗賊
衆恢復縣城宏烈自任巡撫五戰皆捷恢復梧潯平樂三府所
領官兵從未支領俸餉並奉

旨嘉獎下部議敘十七年三月庚申疏報臣遣潯陽副將林大
忠思南副將張文玉等率兵勦賊於容縣西山等處地方大敗
賊衆恢復北流縣城五月戊申又疏報臣同都統勒貝等統領
官兵於四月初十三十五等日自北流陸川博白進勦累敗
賊衆僞總統饒一龍各棄城潛逃恢復鬱林州及北流興業陸
川博白等四縣並得

嘉獎下部議敘是月又疏報僞總兵梁子玉賴天錫聞大兵到鬱林據守白米嶺尙恃險負嵎我兵於四月十六日黎明攻破逆營斬僞總兵梁子玉殺獲甚衆賴天錫拔營遁走下部議敘七月己未疏報僞總兵何興久踞桂東桂陽上猶崇義江楚交界地方臣遣隨征知縣王世誥招諭隨率兵丁一萬餘投誠下部議敘是年正月吳逆聞廣西全省復歸

朝廷孫延齡已反正怒遣其孫吳世琮率將軍總兵等悉精銳由宜章入廣西至桂林誘殺孫延齡二月總督金光祖與賊戰於潯州不利兩廣震動

進賢縣志

卷十八

人物

五十

楚合兵與逆賊戰於藤縣衆寡不敵遂亦失利宏烈平日膽勇過人每戰不能必勝然小挫益厲從不退縮至是以失利爲恨整兵以俟十八年正月吳世琮犯梧州宏烈與鎮南將軍莽依圖率滿漢官兵奮勇拒戰遂大敗之世琮棄營夜遁二月朔捷聞下部議敘八月甲子疏報吳逆賊帥范齊韓踞柳城融二縣窺伺桂柳接應南寧臣檄永寧遊擊鄧林才會合馬承蔭兵協勦擒斬甚衆恢復二縣桂林路通得

旨嘉獎下部議敘加授太子太保十二月甲戌疏辭廣西巡撫任願統兵進勦雲南疏三上

諭如所請 烈遂統兵由柳州徑進至柳州遣提督馬承蔭爲

前隊承蔭者已故提督馬雄子也雄於吳三桂初反時卽舉軍降賊雄死承蔭領父衆屢抗官軍見烈擊敗吳世琮乃復來降至是請宏烈至其署發施號令衆將領咸謂承蔭反覆不可信宏烈言人已降奈何疑之率數十騎往赴諸將懼有變率兵尾行宏烈不知也承蔭見後有兵至疑爲執已遂執宏烈送桂陽時三桂已死其孫世璠僭號居桂陽也世璠素聞宏烈威名欲得爲彼用勸之降宏烈大罵絕粒不食作絕命詞示從者遂遇害事聞

賜祭葬加贈太子太師兵部尚書諡忠毅蔭一子以五品官用初孫延齡判降吳逆宏烈家屬一百四十餘口盡爲逆賊李迎

進賢縣志

卷十八

人物

五十一

春執送吳三桂分散殺戮至是併

予旌卹二十一年二月奉

命立雙忠祠於廣西以殉難廣西巡撫馬雄鎮同祀雍正二年入祀賢良祠乾隆四十年入祀昭忠祠

予世蔭四十四年復

准建專祠於邑著有易理須知經教彙集粵中草秦草燼餘集七世孫猷著刻忠毅公全集行世

傅宏宗字可因應期六子官副將順治十五年奉檄招撫賊衆九義等脅以非刑罵賊死時年二十四

傅宏祖字克繩廣西提標副將陞授總兵進兵滇黔在貴陽殉

難

胡士瑞三十六都源湖人

順治二年間關入閩以選援授兵部司務署職方司主事五年桂王至肇慶士瑞芒鞋入覲補授兵部司務尋擢本部武選司主事福建道御史初孫可望迎王入安龍馬吉翔龐天壽私結可望吉翔遣門生郭璘說士瑞擁戴可望士瑞怒厲聲叱退之可望以相事盡委吉翔天壽於是士瑞與給事中徐極員外郎林青陽蔡縝主事張鏐連章發其奸謀王大怒兩人求救於太后乃免時可望與其私人日夕謀篡位王聞憂懼密謂中官張福祿全爲國曰聞晉王李定國已定廣西軍聲大振欲密下一

進賢縣志

卷十八

人物

五十二

敕令統兵入衛若等能密圖乎二人言胡士瑞徐極林青陽張鏐蔡 曾疏劾吉祥天壽宜可與謀王卽令召之五人許諾青陽請行後吉祥知其事密報可望會士瑞鏐及李元開以王親試極 旦及御史林鍾以久次皆予美官天壽及吉祥弟都督雄飛忌甚與其黨郭璘方謀陷之而士瑞與縝極鏐亦知事洩倉皇劾吉翔天壽表裡爲奸王下廷臣議罪天壽懼與雄飛馳貴陽告可望可望將鄭國與天壽至朝房搃太學士吳貞毓及士瑞鄭久元鍾縝乾昌元開極鍾東旦太僕少卿趙賡禹御史周允吉朱議屢員外郎任斗墟主事易士住繫私室又入宮禽內福祿爲國并嚴刑拷掠衆不勝楚大呼二祖列宗且大罵時

日已暮風雷忽震烈諸人就刑神色不變賦詩大罵而死其家人安瘞於安龍北關之馬場時

順治十一年三月也居三載定國竟奉前敕護王入雲南已建廟於馬場大書十八先生成仁處以旌其忠加贈士瑞都察院左僉都御史諡忠穆

士瑞臨刑詩曰生久雖無補長存報國丹大阿既倒置社稷漸將寒孽子孤忠在幽魂兩淚彈權奸網固漏厲殺定何難

補遺

胡琦原名奇偉字異度進賢人崇禎丁丑進士歷官兵部職方郎金王入江省琦召募豪勇爲恢剿計與金部將馬某戰於羊

進賢縣志

卷十八

人物

五十二

戊戌補刻

平坡多斬獲永甯王復建撫

大清守將退去琦邀擊之新塘路口戰失利生員何畏死之陣亡者百餘人永甯前鋒謝之良與

大兵爭進賢琦率兵助之謝退還撫州琦由間道入天興擢按察司副使分守湖東久之兵敗退駐廣信王得仁兵窺信偕周定初調發堵禦四月二十四日城破被執不屈得仁命置之別室是夜周自經琦聞之嘆曰雲翼得死所矣尋解赴省巡撫李鳳翔巡按吳元贊總兵柯永盛會訊琦角巾儒服立階下李起立離席詢之曰汝何人曰吾登兩榜爲中朝名宦汝奚不知吳因起謂曰公言宜稍遜琦責之曰彼不識字人不知禮義汝讀

聖賢書何爲道此李怒曰我不識字看汝識字人作何舉止令割其耳琦怒叱之曰瞎奴且擲之以扇李大怒立命斬之琦曰我來求死非求生也我死卽禡汝魄矣擁至南昌衛前琦曰卽此可矣行刑者請出城外琦叱曰何地不可死遂不行柯因令行刑琦從容北面四拜曰吾可以見高皇帝於地下矣又語家人曰吾事已畢汝其歸報引領受刃觀者泣下吳親爲棺殮見其子欽宸方乳撫之曰此忠義後也因屬其姪輝媚趙學典同護喪歸禁兵侵掠後數日李暴死其從琦起事死者吳德威吳京胡紹銘胡轉最著

據彭躬菴所撰胡聖占傳則奇偉卽聖占叔也當是南昌人

進賢縣志

卷十八

人物

五十四

戊戌補刻

此云進賢殆悞明史胡奇偉附見於詹兆恆傳中卻亦云進賢人然躬菴與聖占同時姻好旣云奇偉係聖占族當必不

謬也

採錄江人事

按奇偉實進賢十都南頭村人其子孫猶能言之卽與聖占同族卻非同村不得因同族而疑其爲南昌人也前良臣類已載其事茲又補登忠節

陳賚典字天成進賢諸生鄖陽巡撫良訓季子也乙酉憤金王之陷南昌破家起兵兵挫於鈴口遂率鄉勇百輩叩鉛關得謁閣部黃道周言兵事黃奇之隨詣天興陳恢剿機宜疏七上並當王意授監紀推官令與浙江監察御史朱盛濃同事朱開府

鉛山賚典竭蹙行間集士旅遂領三十六營之一屢有戰功復廣信郡題授監軍僉事廣復失退守鉛山已而盛濃被召去賚典遂同武威侯曹大鎬分兵出茶山諸帥各散地就食賚典移駐潤溪金聲桓拔營來攻本部前鋒李相畔降

大清賚典方騎赤馬藍抹首關弓絕谿角李相因指爲讖羣爭獲之賚典且馳且射窘於泥中一矢被執舁解至省見聲桓大罵被殺於洗馬池

採錄江人事

陳大生名以馮字汝資進賢諸生與胡澹等協謀大生官閩歸熟閩事諸客擬制撰封之舉一資大生戊子後大生頗自詡閩來功遂中金王忌受折辱焉江省再破大生走謁粵京面陳方略授某職使聯絡恢勦大生歸依崇仁約鄙時崇有大小約屢

進賢縣志

卷十八

人物

五十五

戊戌補刻

以砮眾格
朝廷命大生思用之資號召近地不利約因不利大生乃導省

兵往執之同一子一僕被戮於市

採錄江人事

胡之瀾字聿脩進賢人丙戌舉事於棲賢山麓有眾近千人
大清守饒將潘永禧率兵至接戰於穀源初騎射久之棄馬立
高岸步射未幾步眾亡潰之瀾馬亦爲亡者乘去潘麾兵四面
圍之矢盡被執入餘干城西門觀者塞路之瀾顧謂曰汝等競
觀胡生胡生面目頭項未嘗異人所異者心當赤而不黑耳比
見縣令張張飲之酒徐謂曰權降以俟時何如之瀾曰君父之

事死生之際不可用權解省見金聲桓叱之曰叛賊汝尚何面
孔眎人金令批其頰齒盡落猶含血噴之罵不絕而死採錄江人
咸豐七年丁巳七月髮逆竄陷邑城官斯土者典史何鏡清死
之所有禦賊殉難紳民雖曰草莽無慙忠節特採訪四境而
備書之

黎際隆城內廩生保舉孝廉咸豐三年癸丑知縣潘尊賢敦請
監修文廟城工適粵逆竄擾遂諭董辦團練殺賊至七年七月
賊大股蜂擁連日環攻舉家勦禦眾寡不敵與姪毓珍品珍保
生俱死於陣是役也男婦大小一家喪命者七人擄去者二人
其舍身殉難亦素志也已上其事

進賢縣志

卷十八

人物

五十六

戊戌補刻

恩卹襲職入祀昭忠祠

趙立彪武庠生一都人靖烽局團練統領屢著勞績咸豐七年
三月臨邑踞匪入寇率眾助官軍敗之七月賊欲從橫擔嶺小
路抵進彪帶團丁防勦不懈賊不能過縣主史知而勞之十月
賊大股來寡不能敵團眾避駐銅嶺口連日與戰至十一月初
七敗北被擒次年五月有自賊逃歸者云彪捉獲到白石陂宋
家賊以官賂威脅欲其降不屈更怒罵之遂遇害往問有老嫗
云賊殺之而棄屍於外四五日羣犬巡邏未毀寸膚村人歸始
埋之指開其穴見面目如生骸骨具備乃嘆忠魂之感格雖犬
亦如守護八年胞姪庠生彬上其事於學使單

萬鏞字孔懷十五都人豪俠好義咸豐七年秋賊破進邑據其城城水環東北惟南門可入鏞統團丁仰攻第南路乃賊往來撫州之處救援實繁團丁始有畏心惟鏞奮勇陷陣團丁亦皆爭先一以當十所到披靡賊不能支城遂克復鏞身負數傷死於陣故進士焦有森上其事部議

恩卹入祀昭忠祠

李士魁字國英號傑生國學生城內西隅人忠孝性成而勇於赴義邑辦團練禦賊初皆畏蒞士魁毅然為之更曉之以義於是無不感激而志切敵愾迭次勦殺立功咸豐七年七月初賊大股圍城官軍潰團練遂敗士魁與孫定元同死於陣賊焚其

進賢縣志

卷十八

人物

五十七

屍士魁僅然鬚眉真忠肝如鐵石非火之能燼也子正芳正芬已上其事

恩予卹典入祀昭忠祠

鄔對揚

廩生保舉孝廉

吳滄三

後港洲人

支廷標

武生

鄧顯奇

彭啟魁

吳得魁

胡金發

傅元標

以上五名俱兵丁俱追賊陣亡以上城內人

趙清元

義方村

趙松林

義方村

趙家琦

熊行之

熊鵬池

樊茂顯

趙彩和

流溪村人上一都人

姜待謨

姜懷起

馬應元

吳廷吉 以上二都人

趙服耕

熊經山

陳瞎子 字守吾 伐鼓 催團戰敗 遇

書以上三都人

朱獻揚 五都人

余五香 鎮嶺六都人

汪信高 虎拜岡人 監生

張義周 石塘人

方進修 下橋人 上七都人

樊永先 菜園村人

陶良策 大廳村人

陶金鳳 湖頭村人

陶應蘭 大廳村人 以上九都人

夏星輝

艾英鳳

萬祥葆 生員 小田人

夏錦祥 以上十都人

進賢縣志 **卷十八** 人物

五十八

朱明亮 從九品 子襲職

王志成 從九品子 襲雲騎尉

蕭時榮

吳宇泉 鷗溪村人

胡行訓

胡宗翰

張義從

胡宗拔

胡書利

胡宗學

胡有恒

張春先

鄒層高

洪發連

胡春榮

王赤州

傅祥珍

洪女俚

詹德成

侯輝照

侯錦榮

焦安清 向嶺人

胡仙金

王袁州

羅德修

余新年 以上一三四都人

胡宗弼

張協清 隆岡村以上十五都人

金作肅 監生

金三品 職員羅盤村以上十七都人

朱觀予 湧橋村

胡有謨 潤山村

胡瑞華

胡廷瓊

胡榮鍾 棗木橋人

威光奎 河塘村以上十八都人

傅善璜 田南村人

熊學慶 田南村以上二十二人

胡蘊麟 武生

徐郢繩 以上二十三人

熊高雲 裡房村以上二十七都人

周壽千

周象千

周才生

周丹鳳

周士勉

周安行

周遠方 俱舊厦村人

楊秉乾 迴峯村以上八名俱禦賊陣亡奉旨撫卹

揚景福 迴峯村人

曹友元 山東村人以上三十都人

進賢縣志

卷十八

殉難

五十九

戊戌補刻

樊振聲 三十四都人

章壽先

章天民

章德泰

章謙恆

章升茂

章新吉

章洪泰

章祥瑞 俱珠坊村人

饒啟祥 介岡村人

鄒仲燦 北岸村以上三十都人

宋茂賢 在城大成人

趙占勝 一都人

支廷高 一都人

支廷啟 一都人

徐四仔 三十八都雷岡人

章金山 三十八都珠坊人

章樹之 三十八都珠坊人

章慶榮 三十八都珠坊人

宋茂賢 在城人

洪志周 八都大岡人

洪啟先 八都人

洪己任 八都萬人

洪惟茂 八都倉下人

萬學勤 八都西邊村

萬元祥 八都榨下村

洪承任 八都萬人

王科玉 三十三都羅溪人

王春生

羅溪十三都人

王榮茂

羅溪十三都人

盧志明

谷岐十三都人

周士紀

寺下十三都人

王勝華

都十六人

王仲聲

都十六人

林存忠

都十六人

劉福順

守備饒州陣亡

徐樹滋

生二十三都貢生子邑庠

胡明武

守備撫州陣

亡

趙彩和

趙占勝

支廷高

支廷啟

俱一都人

陳元福

一都人

胡步階

逆坑十四都人

陳寶魁

武八都生

以上殉節諸人或時地之不同或事實之稍異詳略不等要皆舍生取義而殺身以成仁者故錄之以表忠勇至若名局團董概不登載免爭功也

進賢縣志

卷十八

殉難

六十

戊戌補刻